



PATNUBAY SA MISA



20 Hulyo 2014

Ika-16 na Linggo sa Karaniwang Panahon

Taong A

ANG MISTERYO NG PASIYENSIYA NG DIYOS

Ang masasamang taong nagpapahirap sa mga taong walang sala at nangugulo sa lipunan ay tuwinang parang mga tinik sa laman para sa mga mananampalataya. Di natin madaling ihanay ito sa ating paniwala sa isang Diyos na may pagpapahalaga sa katarungan at nakapangyayari sa sanlibutan.

Nililinaw ito ng Unang Pagbasa at ng Ebanghelyo ngayon. Tinitiyak nito sa ating ang Diyos ay patuloy na nakapangyayari sa sitwasyon, kahit na ang kasamaan (na buhat sa demonyo) ay tila siyang nakapananaig. Balang araw, iiral ang ganap na katarungan. Kaya nga, ang waring di pagkilos ng Diyos ay hindi dahil sa kawalan Niya ng kapangyarihan, kundi dahil sa hangad Niyang makapagdulot ng ibayong pagkakataon para magsisi ang mga gumagawa ng masama.

Sa Ekaristiyang ito, hilingin natin ang lalong matibay na pananalig at biyayang masugpo ang sama sa ating paligid sa pamamagitan ng paggawa ng mabuti hangga't kaya natin. Sabi nga ni San Pablo, "Daigin natin ng mabuti ang masama." (Ro 12:21)



PASIMULA



Pambungad

(Ipahahayag lamang kung walang awiting nakahanda.)

Sa akin ay tumutulong ang Diyos na Panginoon. Sa kanya ko iuukol ang alay ko na hahantong sa ngalan n'yang nagtatanggol.

Pagbati

P –Ang biyaya ng ating Panginoong Hesukristo, ang pag-ibig ng Diyos Ama, at pakikiisa ng Espiritu Santo ay sumainyong lahat!

B – At sumaiyo rin!

Pagsisisi

P –Sa paghahanda natin para sa pagdiriwang ng misteryo ng pagmamahal ni Kristo, aminin natin ang ating mga pagkukulang at hilingin sa Panginoon ang kapatawaran at lakas. (Manahimik saglit.)

P –Sa mga pag-aalinlangan natin

sa karunungan ng Diyos sa pakikitungo sa mga sumusuwat sa kautusang moral, Panginoon, kaaawaan mo kami!

B –Panginoon, kaaawaan mo kami!

P –Sa pagpapabaya nating lumago sa atin ang binhi ng kasamaan habang dumadaing sa patuloy na pag-iral ng sama sa daigdig, Kristo, kaaawaan mo kami!

B –Kristo, kaaawaan mo kami!

P –Para sa di natin pagkilos sa pagpapabalik-loob sa Diyos ng mga naliligaw ng landas, Panginoon, kaaawaan mo kami!

B –Panginoon, kaaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaasan at sa lupa'y kapayapaan sa mga

taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sa-pagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangiang Pambungad

P –Ama naming makapangyarihan, kalugdan mo kami at pagbig-

yan na magkamit ng kaloob mong karagdagan upang sa maalab naming pananalig, pag-asa at pag-ibig kami'y mamalaging tumatalima sa iyong kautusan sa pamamagitan ni Hesukristo kasama ng Espiritu Santo magpasawalang hanggan.

B—Amen!

PAGPAPAHAYAG NG SALITA NG DIYOS



Unang Pagbasa *Kar 12:13.16-19*

Sa siping ito, tinitiyak sa ating ang pasiyensiya at habag ng Diyos sa mga makasalanan ay hindi tanda ng kahinaan, kundi ng hangad Niyang sila man ay magbalik-loob at maligtas.

L—Pagpapahayag mula sa Aklat ng Karunungan

Lahat ng bagay ay nasa ilalim ng iyong pangangalaga, at walang ibang diyos na dapat mong pagsulitan ng iyong mga hatol.

Sa iyong lakas nagmumula ang iyong katarungan, at maari kang magpakita ng habag kaninuman sapagkat ikaw ang Panginoon ng lahat.

Ipinamamalas mo ang iyong lakas sa nag-aalinalangan sa iyong ganap na kapangyarihan, at pinarurusahan mo ang sinumang nakatatalastas nito ngunit nangangahas na di ka pansinin.

Walang-hanggan ang kapangyarihan mo ngunit mahabagin ka kung humatol. Maari mo kaming parusahan kailanma't ibigin mo, ngunit sa halip ay pinamamahalaan mo kami nang buong hinahon at pagtitimpi.

Sa pamamagitan ng ginawa mong iyan ay itinuro mo sa mga taong makatarungan na dapat din silang maging maawain. At binigyan mo naman ng pag-asa ang iyong bayan, sa pagkaloob sa kanila ng pagkakataong makapagsisi.

Ang Salita ng Diyos!

B—Salamat sa Diyos!

Salmong Tugunan *Awit 85*

B—Poon, ikaw ay mabuti sa lahat ng nagsisisi!

R. M. Velez



sa la- hat ng nag-si-si- si!

*** Mapagpatawad ka at napakabuti; sa dumadalangin at sa nagsisisi, ang iyong pag-ibig ay mananatili. Pakinggan mo, Poon, ang aking dalangin. Tulungan mo ako, ako'y iyong dinggin.** **B.**

*** Ang lahat ng bansa na iyong nilalang, lalapit sa iyo't magbibigay galang; sila'y magpupuri sa 'yong kabutihan. Pagka't ikaw lamang ang Diyos na Dakila na anumang gawin ay kahanga-hanga!** **B.**

*** Ngunit ikaw, Poon, tunay na mabait, tapat at totoo, wagas ang pag-ibig; lubhang mahabagi't banayad magalit. Ibaling sa akin ang awa mo't habag, iligtas mo ako at bigyan ng lakas.** **B.**

Ikalawang Pagbasa *Ro 8:26-27*

Tuwina nating kailangan ang tulong ng Diyos di lamang sa ating buhay moral, kundi maging sa ating pagdarasal. Ipinanaalaala sa atin ni San Pablo sa sipi ngayon na ang Espiritu Santo ay siyang nagdarasal sa atin at para sa atin.

L—Pagpapahayag mula sa Sulat ni Apostol San Pablo sa mga taga-Roma

Mga kapatid:

Tinutulungan tayo ng Espiritu sa ating kahinaan. Hindi tayo marunong manalangin nang wasto, kaya't ang Espiritu ang lumuluhog para sa atin, sa paraang di-magagawa ng pananalita. At nauunawaan ng Diyos na nakasaliksik sa puso ng tao, ang ibig sabihin ng Espiritu, sapagkat ang Espiritu'y lumuluhog para sa mga banal, ayon sa kalooban ng Diyos.

Ang Salita ng Diyos!

B—Salamat sa Diyos!

Aleluya

Mt 11:25

B—Aleluya! Aleluya!

Papuri sa Diyos Ama pagka't ipinahayag n'ya Hari s'ya ng mga aba.

Aleluya! Aleluya!

Mabuting Balita *Mt 13:24-43*

"Ang Kahariang kasalukuyang ginagawa" ay sumasaklaw sa kapwa banal at makasalanan. Ito ang malimit

na maging ugat ng kahirapan. Sa parabula para ngayon, tinitiyak na darating ang araw na ang Kaharian sa kaganapan nito ay kabibilangan lamang ng mga tunay na karapat-dapat.

P—Ang Mabuting Balita ng Panginoon ayon kay San Mateo
B—Papuri sa iyo, Panginoon!

Noong panahong iyon, inilahad ni Hesus ang talinghagang ito sa mga tao. "Ang paghahari ng Diyos ay katulad nito: may isang taong naghasik ng mabuting binhi sa kanyang bukid. Isang gabi, samantalang natutulog ang mga tao, dumating ang kanyang mga kaaway at naghasik ng masasamang damo sa triguhan. Nang tumubo ang trigo at magkauhay, lumitaw rin ang masasamang damo. Kaya't lumapit ang mga alipin sa puno ng sambayanan at sinabi rito, "Hindi po ba mabuting binhi ang inihatik ninyo sa inyong bukid? Bakit po may damo ngayon?" Sumagot siya, 'Isang kaaway ang may kagagawan nito.' Tinanong siya ng mga utusan, 'Bubunutin po ba namin ang mga iyon?'

'Huwag,' sagot niya. 'Baka mabunot pati trigo. Hayaan na ninyong lumago kapwa hanggang sa anihan. Pag-aani'y sasabihin ko sa mga tagapag-ani: "Tipunin muna ninyo ang mga damo at inyong pagbigkis-bigkisin upang sunugin, at ang trigo'y inyong tipunin sa aking kamalig."'

[Isa na namang talinghaga ang inilahad ni Hesus sa kanila. "Ang paghahari ng Diyos ay katulad nito: may isang taong nagtanim ng isang butil ng mustasa sa kanyang bukid. Pinakamaliit ito sa lahat ng binhi, ngunit kapag natanim na at lumago ay nagiging pinakamalaki sa lahat ng puno ng gulay. Ito'y nagiging punongkahoy, anupat napamumugaran ng mga ibon ang mga sanga nito."

Nagsalaysay pa siya ng ibang talinghaga. "Ang paghahari ng Diyos ay katulad ng lebadura na inihalo ng isang babae sa tatlong takal na harina, at umalsa ang buong masa."

Sinabi ni Hesus sa mga tao ang lahat ng ito sa pamamagitan ng talinghaga at wala siyang sinabi sa kanila nang hindi gumagamit ng talinghaga. Ginawa niya ito upang matupad ang sinabi ng propeta: "Magsasalita ako sa kanila sa pamamagitan ng mga talinghaga. Ihahayag ko sa kanila ang mga bagay na nalilihim mula nang likhain ang sanlibutan."]

Pagkatapos, iniwan ni Hesus ang mga tao at pumasok sa bahay.

Lumapit ang kanyang mga alagad at sinabi sa kanya, “Ipaliwanag po ninyo sa amin ang talinghaga tungkol sa masasamang damo sa bukid.”

Ito ang tugon ni Hesus, “Ang Anak ng Tao ang naghahasik ng mabuting binhi. Ang bukid ay ang sanlibutan. Ang mga taong pinaghaharian ng Diyos ang mabuting binhi at ang mga taong pinaghaharian ng diyablo ang masasamang damo. Ang kaaway na naghahasik ng mga iyon ay walang iba kundi ang diyablo. Ang pag-aani ay ang katapusan ng daigdig, at ang mga anghel ang mga tagapag-ani. Kung paanong inilpon ang mga damo at sinusunog, gayundin ang mangyayari sa katapusan ng daigdig. Susuguin ng Anak ng Tao ang kanyang mga anghel, at iipunin nila mula sa kanyang pinaghaharian ang lahat ng nagiging sanhi ng pagkakasala at ang lahat ng gumagawa ng masama, at ihahagis sa maningas na pugon. Doo’y manangis sila at magngangalit ang kanilang ngipin. At magliliwanag na parang araw ang mga matuwid sa kaharian ng kanilang Ama. Ang may pandinig ay makinig!”

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B–Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nanga-

matay na tao at sa buhay na walang hanggan. Amen!

Panalangin ng Bayan

P –Kasabay ng pagpapasalamat sa Panginoon sa Kanyang pasi-yensiya sa kabila ng ating pagiging di karapat-dapat, idulog natin sa Kanya ang ating mga kahilingan para sa lahat ng malapit sa ating puso. Maging tugon natin ay:

B –Panginoon, dinggin Mo kami!

* Para sa lahat ng mananam-palataya sa daigdig: Magpunyagi nawa sila sa paggawa ng mabuti sa kabila ng lahat ng samang nakapaligid sa kanila. Manalangin tayo! **B.**

* Para sa Santo Papa at lahat nating pinunong espirituwal: Patuloy nawa silang maging inspirasyon natin at katulong sa pagpapalaganap ng pagmamahal ng Diyos sa mundo. Manalangin tayo! **B.**

* Para sa mga biktima ng kasamaan sa lipunan: Maging kasiyahan at lakas nawa nila ang pananalig sa karunungan, habag, at katarungan ng Diyos. Manalangin tayo! **B.**

* Para sa mga tila damong ligaw sa daigdig: Nawa maunawaan nilang ang pasi-yensiya sa kanila ng Diyos ay hindi pampasigla sa kanilang magpatuloy sa kasamaan, kundi isang pagkakataon para sila’y magbalik-loob. Manalangin tayo! **B.**

* Para sa lahat ng taong may mabuting kalooban at nagsisikap sa pagsugpo ng kasamaan: Huwag nawa silang panghinaan ng loob, kundi magsumikap pang lalo sa paggawa ng mabuti. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil saglit.*) Manalangin tayo! **B.**

P –Diyos ng awa at katarungan, tulungan Mo kaming lipulin ang sama sa ating mga puso at magsikap para sa pagbabalik-loob ng mga sumusunod sa masama. Lahat nawa kami’y magpunyagi sa paglingkod sa Iyo hanggang marating namin ang Kaharian sa kaganapan nito kung saan Ka nabubuhay at naghahari nang walang hanggan!

B –Amen!

**PAGDIRIWANG NG
HULING HAPUNAN**



P–Manalangin kayo . . .

B–Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P –Ama naming Lumikha, lahat ng iyong mga paghahaing ipinagutos noong araw ay iyong pinagtibay sa isang haing hantungan ng tanan. Tanggapin ang ginaganap ngayon ng iyong mga lingkod at basbasan mo ito ng kabanalang gaya ng iyong kaloob sa mga alay ni Abel na lubha mong ikinalugod upang ang mga handog ng bawat isang nagbigay para sambahin ang banal mong ngalan ay magkamit ng karagdagan mong kasiyahan sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo VII

P –Ama naming makapangyarihan, tunay ngang marapat na ikaw ay aming pasalamat.

Kahit na ikaw ay pinagtak-silan ng sangkatauhan, ikaw ay patuloy pa rin sa iyong pagmamahal. Ikaw na ang nagpuno sa aming pagkukulang; ikaw pa rin ang nagsugo ng tutubos sa tanan. Ang sugo mong Anak ay naging di na iba sa amin bagama’t di niya tinularan ang aming pagkamasuwayin. Nilooob mo ito upang iyong mamalas sa aming pagkatao ang giliw mong Anak at kami’y tunguhan mong may pag-ibig na tulad ng pagtatangi mo sa kanya nang higit sa lahat. Ang katapatan niya sa iyong walang maliw ay nagpanumbalik na muli sa amin ng iyong kasiyaha’t ng iyong pagtingin na aming iwinaksi noong ikaw ay aming suwayin.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

B – Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B –Sa krus mo at pagkabuhay kami’y natubos mong tunay, Poong Hesus naming mahal, iligtas mo kaming tanan ngayon at magpakailanman.



B – Ama namin . . .

P – Hinihiling namin . . .

B – Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B – Kordero ng Diyos . . .

Paanyaya sa Pakikinasabang

P – Ito si Hesus, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B – Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinasabang

(Ipahayag lamang kung walang awiting nakahanda.)

Ngayon ay ginugunita Poo’y mahabaging lubha. Sumasamba’y sasagana sa pagkain niyang handa sa magsabing s’yay dakila.

Panalangin Pagkapakinabang

P – Ama naming mapagmahal, manatili kang kapiling ng iyong sambayanan na ngayo’y pinapakinasabang mo sa iyong sariling buhay at gawin mong kami’y pasulong na makahakbang mula sa dati naming pagkamakasalanan patungo sa pagbabagong nagdulot ng iyong kabutihan sa pamamagitan ni Hesus Kristo kasama ng Espiritu Santo magpasawalang hanggan.

B – Amen!



Word & Life Publications

PAGWAWAKAS



P – Sumainyo ang Panginoon.

B – At sumaiyo rin!

P – Magsiyuko kayo at ipanalangin ang pagpapala ng Diyos. (Tunigil saglit.)

Iligtas nawa kayo ng Panginoon sa lahat ng masama sa mundong puno ng tukso at masasamang halimbawa.

B – Amen!

P – Tibayan Niya nawa kayo sa inyong kapasiyahang mana-

tiling tapat sa Kanya hanggang sa dulo ng inyong buhay.

B – Amen!

P – Gantimpalaan Niya nawa kayo nang sagana, sa buhay na ito’t sa buhay na darating, sa inyong pagpupunyagi sa paggawa ng mabuti.

B – Amen!

P – Pagpalain kayo ng makapangyarihang Diyos: Ama, Anak, at Espiritu Santo.

B – Amen!

P – Humayo kayo sa kapayapaan ni Kristo!

B – Salamat sa Diyos!

KASAMAAN AT ANG KAPANGYARIHAN NG DIYOS

Ang pagkakaroon at balasik ng **kasamaang moral** sa mundong pinamamahalaan ng Kalinga ng Diyos ay nakalilito. Wari pang nakagugulo kapag nakakabalita tayo ng kasamaan maging sa Simbahan mismo na siya pa mang inaasahang maging simula at “tanda” ng Kaharian.

Ang lalong nakalilito sa atin ay ang tila di pagkabahala ng Diyos sa harap ng ganitong sitwasyon. **Bakit Niya pinapayagan ang mapanirang kasamaan sa daigdig at sa Simbahan?** Ang pangunahing sagot sa tanong na ito ay: **Ang ibig ng Diyos ay ang pagbabalik-loob ng mga makasalanan, hindi ang kanilang kamatayan.** (Sangguniin Ez 18:23 at 33:11.) Ngunit mahaba’t matagal na proseso ang pagbabalik-loob . . . Samantala, **humahango ng buti ang Diyos kahit na sa kasamaan.**

Ang ganitong “pahintulot” sa pagpapatuloy ng kasamaan ay maaaring isang pagsubok sa katapatan ng Kanyang mga anak, upang sila’y hamuning “sumulong,” upang sila’y mag-ingat at magpakumbaba. Pinahihintulutan ng Diyos ang kasamaan upang humango sa mabubuting tao ng tunay na tapat na pagmamahal.

Ang kasamaan ay hindi lamang nasa paligid natin. Ito’y tunay na nasa loob ng bawat isa sa atin, sa iba’t ibang antas, at malimit na patago, ngunit gayunma’y laging malamang na lumago at sumalakay. . .

Ang pasiyensiya ng Diyos sa maraming anyo ng kasamaang moral sa daigdig at sa atin ay hindi nagpapahiwatig ng kahinaan o pagsuko. Ibig lamang sabih’y **mahal Niya ang lahat ng tao.** (Sangguniin Mt 5:45.) Alam Niyang tayo’y mahina. “Nakakakita” Siya nang lampas sa ating pagkaka-maling moral. Patuloy Siyang nagpapadala ng mga pakiusap at paalaala. **Iginagalang Niya ang ating pagbabalik-loob at mabagal na pagsulong.**

Mapagpasiyensiya ang Diyos ngunit hindi walang kaya. Siya’y mapagmahal at mahabagin, ngunit makatarungan din. Sa katapusan, kabutihan at katarungan ang dapat manaig at tiyak na mananaig. Sa Kanya ang huling pahayag. Sa kabila ng ingay na kayang likhain ng kasamaan, sa kabila ng mga pagbabanta at pang-iinsulto nito, **ang Diyos ay siyang nananatiling nakapangyayari sa sitwasyon.** Alam Niya kung kailan magpapahayag ng “tapos na!” Lyon ang magiging oras ng paghahatol, at **bawat isa’y gagantimpalaan ayon sa kanyang ginawa.** (Sangguniin Mt 13:42-43 at 16:27.)

Gayon ang aral ng parabula ng trigo at ng mga damo. Ang buong Bibliya, lalo na ang Pahayag, ay saksi sa katuparan nito.



WORD & LIFE
PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

E-mail: marketing@wordandlife.org, wordandlifepublications@gmail.com • FB: Word & Life Publications

Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio, V. David, M. Navajas • Illustrations: A. Sarmiento, B. Cleofe • Circulation: F. Edjan